

陶雲汀先生奏疏

奏疏卷三十八目錄

江督稿

安化陶澍

保舉堪勝總兵摺子

江西巡撫出缺請

旨簡放摺子

恭謝

頒賞福壽字暨麇鹿肉摺子

耆紳重遇

恩榮懇請與宴摺子

附奏耆紳重遇薦揚懇請與宴摺片

彙奏各岸一年銷鹽總數摺子

請以降調道員留辦淮北鹺務摺片

揀員陞署水師副將摺子

鹽務奏銷展限竝淮北未盡事宜摺子

兩淮積欠參價請分綱卽先歸補免其生息摺子

請分別緩徵江淮等屬舊欠錢糧摺子

挈獲拒捕訟棍摺片

奏請借項挑挖宿州運糧河道摺子

查覆辦理災務尙無玩視災務之員摺子

採買轉運災區減糶摺片

保舉堪勝總兵人員摺子

奏爲遵

旨保舉堪勝總兵之副將仰祈

聖鑒事竊臣接准部咨欽奉

上諭現在陸路副將記名以總兵用人員將次用竣  
著各省總督及兼管提督之巡撫於所轄副將內  
擇其品藝優長曉暢營務堪膺專閫者各保奏一  
二員出具切實考語卽行送部引見候朕簡用欽  
此伏思總兵職膺專閫必須紀律嚴明而又有  
勇知方才品兼優方足以資統率臣所轄三省

陸路副將除安慶營副將長喜一員已於道光九年保舉堪勝總兵引

見奉

旨交軍機處記名在案茲臣於所轄逐加遴選查有江寧城守營副將惠普恩年五十八歲山東濟寧州人由行伍拔補漕標把總歷陞江南海州營都司先後挈獲梟匪五十餘名保送引

見蒙

恩賞戴花翎洊陞江寧城守營副將該員老成練達營務嫻明於訓練兵技巡緝地方俱能實心經

理臣近在省城見聞較切又江西南昌城守營副將李廷鈺年四十歲福建同安縣人由承襲三等伯學習三年送部引

見奉

旨著以二等侍衛在大門上行走欽此道光四年期滿引

見奉

旨補授南昌城守協副將曾於六年上保舉堪勝因到任甫歷年餘奉

旨毋庸送部現在已闕六年資格久深覈查該員年

強才優暢曉營務屢署總鎮辦理裕如經江西撫臣吳光悅咨明會辦前來以上二員堪勝總兵之任臣謹遵

旨出具切實考語保

奏如蒙

俞允再行給咨送部引

見恭候

欽定所有陸路副將堪勝總兵緣由謹會同江西撫

臣吳光悅合詞恭摺具

奏伏乞



皇上聖鑒謹

奏

道光十一年十二月二十一日具

奏十二年正月二十六日奉到

硃批俱著送部引見欽此

巡撫出缺請

旨簡放摺子

奏爲江西巡撫出缺恭摺由驛馳

奏請

旨迅賜簡放併分別委員護理兼署以專責成仰祈

聖鑒事

臣

於十二月二十四日接到江西布政使岳

良稟稱撫

臣

吳光悅因積勞心火上升於是月

十三日出缺所有巡撫關防及

王命旗牌等件恭貯庫內撫署日行文案由該藩司  
代行代閱遇有緊要公務用藩司印信代辦等

情臣查江西省本年災賑事宜及設法辦理鹽務隨在均關緊要卽一切題咨案件用藩司印信代辦不足以昭慎重應卽委令藩司岳良護理巡撫印務其藩司缺卽委臬司劉重麟暫行兼署俾專職守除分別移行遵照外所有江西巡撫員缺懇

恩迅賜

簡放以資治理臣謹恭摺馳

奏伏乞

皇上聖鑒訓示謹

奏

道光十一年十二月二十四日由驛具

奏十二年正月十一日奉到

硃批已有旨欽此又於十二年正月十九日准

護理江西撫院岳良咨正月初八日奉到十一年十二月二十七日內閣奉

上諭江西巡撫著吳邦慶補授卽速赴新任毋庸來京請訓漕運總督著蘇成額補授蘇成額未到任以前所有漕運總督卽務著張井兼署欽此

恭謝

頒賞福壽字暨麇鹿肉摺子

奏爲恭謝

天恩仰祈

聖鑒事道光十一年十二月二十三日

臣

賈摺差弁

回江捧到

恩賞福字壽字二方暨麇鹿肉一分當卽恭設香案  
望

闕叩頭祇領欽惟我

皇上德備福基

盤延壽寓啟韶年而

錫羨

澤普春臺協吉日以

頒珍

恩推冬勝當此

龍光下逮適逢鳳紀更新

義畫親瞻

堯羹如見

奎文星煥光生大地之陽和仙脯霞蒸色滉

九天之沆瀣

臣

自維謫劣忝領封圻疊荷

鴻施渥叨泰養稟

褒題於幹國在梁則福祿駕從遊

景貺於宜年多祉而壽昌燕喜念天縣具辟邪之性

口豈羣調惟雲龍昭捧

日之心輝常近接所願河清海晏祝

一人之介景延洪更欣民樂年豐合三省而飲

和食

德所有臣感激下忱謹繕摺叩謝

天恩伏乞

皇上聖鑒謹

奏

道光十二年正月初十日具

癸二月初九日奉到

硃批知道了欽此



耆紳重遇

恩榮懇請與宴摺子

蘇撫會同

奏爲耆紳會榜重逢懇

恩與宴以光

盛典仰祈

聖鑒事據江寧藩司趙盛奎詳稱寄籍江寧府上元

縣原任閬川重慶府銅梁縣知縣貴逢甲現年

八十八歲係湖南常德府武陵縣民籍由監生

中式乾隆三十五年庚寅

恩科順天鄉試舉人壬辰

恩科會試進士選授河南項城縣知縣引

見改授四川銅梁縣知縣歷署合州知州充丁酉科四

川鄉試同考官告病回籍就醫江南嘉慶二十  
三年遵例入籍上元上年辛卯

恩科咨准重赴鹿鳴恭逢道光十二年壬辰

恩科會試計距中式進士之期已逾花甲重週例得  
重赴

恩榮筵宴循照已丑會試蘇州府在籍戶部主事潘  
奕雋重與筵宴之案詳請具

奏前來

臣

等查該原任四川重慶府銅梁縣知縣

貴逢甲年逾八袞身歷

三朝雁塔名題早食紅綾之餅雷封化洽昔分青綾之  
符濯來錦水芙蓉曾佐衡文於秋試開到公門  
桃李又逢取士於春官詩厝鹿野之三昨歲已  
邀

曠典花囀鶯庭而百重來宜沐

殊恩所有耆紳重遇

恩榮懇請與宴緣由除咨明禮部外謹合詞恭摺具  
奏伏乞

皇上聖鑒謹

奏

道光十二年正月初十日具

奏二月初九日奉到

硃批另有旨欽此同日奉到正月二十四日內閣奉  
上諭陶澍等奏耆紳重遇恩榮懇請與宴一摺江蘇  
原任四川銅梁縣知縣貴逢甲年逾八袞會榜再  
逢洵屬藝林盛事著加恩賞加知州銜准其重赴  
恩榮宴以示朕嘉惠耆儒至意欽此

附奏書紳重遇應揚懇請與宴摺片

再據江寧布政使詳稱原任浙江溫州鎮總兵  
李景會江南通州人現年八十五歲由乾隆辛  
卯科武舉擢用南匯營都司洊歷山東登州遊  
擊浙江玉環叅將瑞安副將陞授溫州鎮總兵  
署理浙江提督曾經先後在洋勦捕海匪受傷  
著勞經兵部

奏准給與功劄緣染濕疾懇准解任回籍調理上  
年恭遇辛卯

恩科鄉試花甲一週例得邀准

奏請與宴據該員原籍地方官取造履歷冊結加

結轉詳請

奏前來臣查各省鄉試遇有武舉出身三品以上  
武職無論現任在籍其中武科分適遇花甲已  
週應重赴應場宴者例准先期具

奏請

旨上年江南省辛卯

恩科武闈鄉試

奏准展至本年三月舉行今原任浙江溫州鎮總  
兵李景曾中式武舉科分已逾週甲之期欣逢

萬壽作人重開虎榜合與羣英共宴同赴鷹揚以獎  
耆年而昭

曠典理合循例附片陳明請

旨伏乞

聖鑒謹

奏

道光十二年正月初十日附片具

奏二月初九日奉到

硃批另有旨欽此同日奉到正月二十四日內閣奉  
上諭陶澍等奏總兵重遇鷹揚請與筵宴等語原任

浙江溫州鎮總兵李景曾年逾八旬再逢鄉舉洵  
屬武科盛事著加恩賞加頭品銜准其重赴鷹揚  
筵宴以獎耆年而昭茂典欽此



彙奏各岸一年銷鹽總數摺子

奏爲循例彙覈淮南北綱食各岸道光十年分銷  
鹽總數恭摺具

奏仰祈

聖鑒事竊照兩淮銷引考覈前因題奏參差於道光  
二年經前鹽政臣曾燠等會請嗣後綱食各岸  
一律按年奏報考覈奉

旨准行又湖廣省銷鹽考覈道光八年因岸鹽積滯  
經前任湖廣督臣嵩孚

奏准展限至道光九年六月截數造報以後每年

提上一月嗣於道光十年復經湖廣督臣盧坤  
請將展限之案停止仍自道光十一年爲始按  
年考覈銷數其道光十年五月起至十二月底  
止實銷過鹽五十四萬四千餘引奉部議令將  
湖南湖北兩鹽道督銷分數報部考察各等因  
在案茲查考覈道光十年銷數湖廣江西二省  
額共應銷淮南綱鹽一百五萬七千二百二十  
五引內除湖廣省截停展限之案將五月起至  
十二月底止實銷鹽數另開咨部外江西省額  
應銷鹽二十七萬七千二百九十九引已銷過

鹽十六萬四千九百二十九引計缺銷鹽十一萬二千三百七十引該省例係通融銷售照案取具督銷鹽道職名開叅又江南省安慶等府州額其應銷淮南綱食引鹽三十三萬八千二百八十五引內除安慶府屬各縣額銷鹽五萬一千九引屢催未據報到開除另辦其餘各州縣共銷過鹽十八萬二千二百二十三引計缺銷鹽十萬五千五十三引又江南省屬之鳳陽等府州縣河南省屬之汝寧等府州縣額其應銷淮北綱食引鹽二十九萬六千九百八十二

引內除廬州府屬之無爲廬江巢縣鳳陽府屬之鳳陽靈璧懷遠定遠濶州屬之盱眙天長五河潁州府屬之阜陽潁上亳州太和淮安府屬之山陽清河滁州竝所屬來安縣徐州府屬之邳州等州縣額銷鹽十萬六千一百七十九引銷數未據報到併有開報運銷引數不符者逐一分別催查另行補報外其餘各州縣其銷過鹽十五萬一千九百七十三引計缺銷鹽三萬八千八百三十引據陞署兩淮鹽運使俞德淵會同江南鹽巡道葆謙河南鹽法道黎學錦分

案造具經接督銷各州縣職名冊揭詳送前來  
臣查兩淮綱食各岸道光十年分額銷均有短  
缺除將缺銷之各鹽道州縣職名冊揭咨部議  
處茲准查未報各州縣銷數另行咨部一面隨  
時嚴飭各鹽道督同各州縣實力緝私疏銷外  
所有道光十年分淮南北綱食各岸銷鹽總數  
理合循例恭摺具

奏伏乞

皇上聖鑒謹

奏

道光十二年正月初十日具

奏二月初九日奉到

硃批戶部知道欽此

請以降調道員留辦淮北釐務摺片

再淮北鹽引滯銷前經臣附片

奏明將暢岸仍歸商運其缺鹽各滯岸卽於海州所屬之中正板浦臨興三場設局收稅聽民購買給票運往售賣茲於道光十二年正月初五日接奉

諭旨著臣卽飭運司妥議條款酌量試行等因應卽欽遵趕緊籌辦查此案前經

奏請飭委降調運司王鳳生馳往勘辦已據將大概情形回省面稟惟海州地勢平行一切道里

遠近水陸要隘應如何稽查事當試行之初必須籌畫精詳兼之五端十損向來商運道路逐處阻礙現擬另議改道運行必須逐一履勘及販運價值給票章程均須因地制宜細心釐定以期行之有濟必得熟諳大員總司其事庶足以資經理而專責成查運司駐劄揚州離淮北各場尚有六百餘里旣未能遙爲兼顧原委之王鳳生因湖廣督臣盧坤

奏明委辦堤工水利業於去臘催調赴楚現在本省候補道府均已委署地方其現任各員亦俱



有緊務且並無熟悉鹽務之人堪以委用查有前任淮揚道鄒錫淳因公降調經臣請畱馬棚灣工次効力業已竣事該員世業淮鹺情形素悉且在淮揚道任內五年淮北河道地形知之尤熟於設局改道各務可期得力合無仰懇

聖恩准令飭委該員前往淮北督同監掣分司各員察勘情形會同地方官確細籌辦以收臂指之效其一切給票抽稅章程仍會同署運司俞德淵妥籌議詳由臣隨時具

奏辦理謹附片陳明伏乞

聖鑒謹

奏

道光十二年正月初十日具

奏二月初九日奉到

硃批另有旨欽此同日奉到正月二十四日內閣奉  
上諭陶澍奏降調道員委令會辦淮鹺等語淮北鹽  
引滯銷各岸前據該督奏准於海州所屬之中正  
板浦臨興三場要隘設局抽稅及販運價值給票  
事宜必須熟悉鹺務之員責成經理以期行之有  
濟江蘇降調淮揚道鄒錫淳著准其前往淮北督

同監掣分司各員察勘情形會同地方官確細籌  
辦其一切給票抽稅章程仍與該署運司俞德淵  
會議妥辦欽此

揀員陞署水師副將摺子

奏爲水師副將員缺緊要懇

恩俯准陞署以裨地方仰祈

聖鑒事竊准兵部咨江南太湖營副將李恩元補授  
浙江溫州鎮總兵所遺副將係內河水師題補  
之缺該省現無預保註冊之員應用應題人員  
行令照例題補等因臣查太湖營副將駐劄蘇  
州府吳縣洞庭東山地方管轄太湖左右二營  
分防太湖廳吳縣長洲吳江震澤無錫陽湖宜  
興荆溪等縣水陸汛地七十處界連浙省素爲

盜匪出沒之區額設防湖沙唬巡快船五十四隻有督率哨巡彈壓緝捕之責必得精明強幹熟悉風土情形之員方資得力例於川沙吳縣二營水師叅將內選補查川沙營叅將甫經臣題請以京口右營遊擊孫廷揚陞補尙未准到部覆惟查有吳淞營叅將鮑起豹現年四十歲安徽人由雲騎尉呈改外海水師陞調蘇松鎮標中營外海水師遊擊曾經預保註冊上年六月

經臣

奏明該員於蘇松洋面屢獲盜梟海運案內巡防

尤爲出力係江蘇省水師中情形熟悉不可多得之員欽奉

恩旨准畱江蘇省遇缺陞補旋經委署吳淞營叅將於七月初一日到營任事十一月內經部掣補題准給劄該員才優技練熟悉水師以之請陞太湖營副將實堪勝任惟歷俸未滿一年與例稍有未符伏查嘉慶十二年間署吳淞營叅將沈天貴歷俸未滿一年曾經前任督臣鐵保奏准陞署京口水師副將扣滿歷俸年限另請實授有案合無仰懇

聖恩俯准以鮑起豹陞署太湖營副將洵於水師營  
伍地方有裨如蒙

俞允該員引

見未滿三年遵例毋庸送部仍俟扣滿歷俸年限再  
行題請實授以符定例除查取履歷咨移部科  
查覈外臣謹會同江蘇提督臣王應鳳合詞恭  
摺具

奏伏乞

皇上聖鑒訓示謹

奏

道光十二年二月初六日具

奏三月初四日奉到

硃批另有旨欽此同日奉到二月二十一日內閣奉  
上諭陶澍奏揀員陞署水師副將一摺著照所請江  
南太湖營副將員缺准其以鮑起豹陞署仍俟扣  
滿歷俸年限再請實授該部知道欽此



鹽務奏銷展限竝淮北未盡事宜摺子

奏爲鹽務奏銷屆期遵

旨奏明稍寬時日辦理竝察看淮北未盡事宜分別  
覈辦以清界限仰祈

聖鑒事竊臣奉

命管理兩淮鹽務於道光十一年三月開行辛卯新  
綱先於二月初六日承准軍機大臣字寄正月  
二十七日奉

上諭陶澍奏接受兩淮鹽篆竝陳現辦情形一摺據  
稱兩淮鹽務積弊之後章程甫立節目尙多現在

商人力能辦運者不過二三十家新商僉募尙需  
時日兼之漢口積引不下數千萬硯非兩三月所  
能罄盡江西情形亦然前綱旣滯則辛卯新鹽卽  
截清界限於春月開綱而行抵楚西各岸已在夏  
秋之際明歲奏銷不能如期完竣等語自係實在  
情形所有明歲奏銷著准其稍寬時日屆期奏明  
辦理此後仍當年清年款不得復蹈故轍其餘未  
盡各事宜並著該督隨時察看分別奏咨覈辦等  
因欽此欽遵卽督飭運司飭商領運並委員分赴  
江西湖北等省催辦疏銷其時楚西各岸均有

節年滯銷舊引甚多皖省沿江食岸亦然俱屬  
佔攔成本有礙銷數內惟楚省查辦腳鹽最爲  
認真截至十一月間已銷引五十餘萬道爲歷  
年所未有第係己丑以前已納錢糧因公墊佔  
之引與新綱無涉而商力久乏非俟舊鹽售出  
不能抽本接辦新鹽不得不讓出地位令其趕  
緊先銷以便轆轤轉運迨至新鹽運抵口岸舊  
鹽甫將銷訖又恐後鹽難繼經運司詳照緩納  
舊案趕辦新鹽四十萬引旋又數數照辦而爲  
時已近歲暮現入本年二月距辛卯開綱已屆

一年期滿例應奏銷查覈綱引實祇請運及半  
安慶池州太平及各食岸僅及十之二三總由  
舊積太多壓累新綱商力已疲難於接濟兼之  
去夏新鹽發運時陡值長江盛漲各省被水凡  
產鹽之場竈運鹽之道路掣捆之洲地以及行  
銷之口岸莫不同時淹漫轉運維艱致滋遲滯  
應請展至本年八月底俾得稍寬時日趕運辛  
卯綱鹽一俟將次竣卽儻辦壬辰新綱嗣後  
仍當逐漸提早以冀挨復舊規不任遲逾至淮  
北鹽引疲弊已久無商領運前經臣會同王鼎

寶興會議另籌辦理復經臣於去臘

奏請試行票引納稅之法現經委員前往海州各  
場查勘一切未盡事宜尙須三兩月間方能籌  
立章程分別奏咨辦理未便仍與淮南綱引奏  
銷牽扯竝辦應請將額引劃出另辦俟年底覈  
算再行具奏以清界限而昭覈實合併聲明據  
運司俞德淵議詳前來臣謹繕摺具

奏伏乞

皇上聖鑒謹

奏

道光十二年二月初六日具

奏三月初四日奉到

硃批另有旨欽此同日奉到二月二十一日內閣奉  
上諭陶澍奏鹽務奏銷屆期請稍寬時日竝察看淮  
北未盡事宜分別覈辦一摺著戶部議奏欽此

戶部議

奏臣等覆查兩淮鹽課例係次年二月奏銷歷年  
以來因引目壅滯轉運不前迭經前任鹽政奏  
請展限以後每綱趲前一兩月及三四月不等  
仍按年提歸原限奏銷歷屆遵循原係權宜辦

理之法茲據該督奏稱上年接管鹽務奏奉

諭旨所有明歲奏銷著准其稍寬時日屆期奏明辦理等因遵卽督飭領運其時楚西各岸均有節年滯引皖省食岸亦然商力久乏非俟舊引售出不能抽本接辦新鹽本年二月距辛卯開綱一年期滿例應奏銷查覈綱引實祇請運及半食岸僅及十之二三總由舊積太多壓累新綱商力已疲難於接濟兼之新鹽發運時陡值長江盛漲各省同時被淹轉運遲滯應請展限至本年八月底俾得稍寬時日起運辛卯綱鹽嗣

後仍當逐漸提早挽復舊規等語臣等伏查兩淮鹽務疲乏已久積習相沿一時整頓誠非易易道光十年臣王鼎等奉

命清查減去一切浮費並停徵各項積欠以冀商力稍紓運課無滯並奏請將庚寅一綱停其捆運卽由辛卯綱起定於正月開綱年清年款以復舊規等因在案嗣據該督以新章甫定節目尙多改於十一年三月開行辛卯新綱茲當奏銷屆期復以舊積太多壓累新綱加以食鹽口岸陡遇江水淹漫轉運維艱奏請稍寬時日一俟



趕運就竣卽趨辦壬辰新綱查奏銷寬限一日  
卽佔礙下綱一日之引今請限至八月底始行  
奏銷則壬辰新綱勢必積壓至九月開行似此  
遞年推展恐敎統引之漸且該督接辦於初次  
奏銷卽行推展仍不能年運年銷實於鹽務新  
綱大有關礙惟所稱銷鹽雖多均係已丑以前  
已經納課之引與新綱無涉兼以新鹽發運陡  
值各省被水轉運遲滯亦係實在情形自應稍  
予展緩俾資趕運但該督遽請展至半年爲期  
未免過久且恐新綱難以接辦臣等公同酌議

請予限四個月擬令展至六月內造報奏銷較之例限已寬該督自可從容辦理况現在舊鹽既已掃數全完楚西各岸均屬暢銷該督應卽迅飭各商及時捆運不得再有推諉遲逾致礙壬辰開綱地步至歷次展限成案均據奏明提前數月趨歸原限此次僅稱逐漸提早其次年如何提前以復原限之處竝未據詳細聲敘應仍令該督確定限期據實具奏再行覈議又現據該督將本年春季撥冊送部臣等查覈冊造新收銀五十餘萬兩加以上年秋撥造報銀二

十餘萬兩統計辛卯一綱徵完正雜課項僅止七十萬餘兩竝據聲明除開銷各款外實存銀二十餘萬兩畱爲甘肅兵餉及各場口糧之需是該處鹽務雖有報撥之名而臣部實無可撥之項經費攸關豈容有名無實應令該督於限滿奏銷時務將通綱課項實力徵齊報部撥用總期年額年清毋許將外支各款佔用又滋轆轤再查兩淮例入奏銷課項共銀二百十餘萬兩此外加勛正課竝應解帑利約共銀一百三十餘萬兩其餘外支外銷各款現當大加釐剔

之後覈計一歲實共徵支銀若干兩前經行令造冊送部據該督咨覆請俟綱竣後按款查明確實造報伏思臣部職司綜覈內外動用款目均應統籌盈絀而奏銷正項尤爲帑課所關若將應行入撥之銀概以外支動用而外支各款復不查報現在辛卯本綱已屆一年期滿該督又請推展奏銷是款冊仍復未能造送似此無從稽覈誠恐出納仍多含混應令速卽分晰冊報以憑查考倘經此次飭催之後仍前延宕竝不能按款指明是其中有無浮濫之處臣部無

可鈎稽若遇各該省請撥要需惟有按照應徵數目先儘動撥以重課款而杜挪移至淮北未盡事宜應令迅速妥議章程分別奏咨辦理其請劃出額引俟年底覈算再行具奏之處統俟該督定有章程另行酌議以昭覈實等因奉

上諭前據陶澍奏鹽務奏銷屆期請稍寬時日竝察看淮北未盡事宜分別覈辦當交戶部議奏茲據奏稱兩淮鹽務疲乏已久現在銷鹽雖多均係已丑以前已經納課之引與新綱無涉其新鹽發運陡值各省被水轉運遲滯亦係實在情形自應量

子展緩惟奏銷寬限一日卽佔礙下綱一日之引  
該督遽請展限半年恐新綱難以接辦著予限四  
箇月展至本年六月內造報奏銷至楚西各岸均  
屬暢銷該督卽迅飭各商及時捆運其次年如何  
提前以復原限之處竝著確定限期據實具奏至  
兩淮例入奏銷課項共銀二百十餘萬兩此外加  
餉正課竝應解帑利及外支外銷各款當大加釐  
剔之後俱應按款造報現在辛卯本綱將屆一年  
期滿竝著該督速卽分晰造冊報部以備查覈其  
淮北未盡事宜亦著迅速妥議章程分別辦理餘

依議欽此

兩淮積欠參價請分綱卽先歸補准兌生息摺  
子

奏爲兩淮積欠參價請分綱卽先歸補恭懇

聖恩准免生息以利商運事頃臣承准軍機大臣字  
寄道光十一年十二月初九日奉

上諭本日內務府奏議駁陶澍請將兩淮變價參餉  
暫緩領變一摺併另片奏催解變價餘參銀兩已  
降旨依議矣每年盛京等三處進到參餉向係將  
餘參分交兩淮等處變價所有本年應發兩淮變  
價參餉著陶澍迅速派員赴京承領發商變價毋



得遲延又兩淮歷年欠交參劬變價銀九十六萬  
四千餘兩應飭原領變價參劬各商將此項積欠  
銀兩作爲帑本按一分生息每年息銀十一萬五  
千六百餘兩遇閏加增自道光十一年起應得利  
銀卽於次年按數解交內務府以備公用著該督  
卽飭令各商遵照妥辦其餘應交各款積欠銀兩  
著該督派員按數解交以清款項又內務府三旗  
舊養育兵錢糧一款每年係將細小餘參發交兩  
淮變價以備支放所有道光八九年兩淮共應  
交此項餘參變價銀四萬二千九百兩至今尙未

交納實屬延玩著陶澍一併趕緊委員按數解交  
毋許再有遲逾致干重咎將此諭令知之欽此當  
卽轉行欽遵除辛卯年應領參劄先已飭派京  
餉委員赴京請領外伏查兩淮積欠參劄變價  
共銀九十六萬四千七百零內已徵銀三十七  
萬三千一百九十四兩零爲運庫墊佔於清查  
案內據實開列聲請分綱歸補先後奏奉

諭旨允行尙有未徵銀五十九萬八百十二兩零向  
例發變參劄俱按各商請運引數派領繳價因  
丙戌統引半綱未行丁亥統全綱未行已丑停

運三分庚寅全綱停運以致各綱參觔未能全  
行領變驗明存貯實參一百三十七觔有零總  
緣運滯課懸以致捫壓積欠仰蒙

皇上准照內務府所請畱作帑本生息實荷格外  
恩施何敢再以下情上陳

宸聽惟是兩淮疲敝已深皆由錢糧逐漸加增以致  
負重難勝全局因之渙散溯查

國初淮綱正課原祇九十餘萬兩加以織造銅觔  
等款亦止一百八十餘萬兩每引僅徵銀一兩  
有餘迨後鹽規匣費節省等項多由陋規改爲

額款加增一百餘萬兩再加外支兵餉養廉巡緝辛工書院議舉辦公等費一百數十萬兩科則已數倍於原額自乾隆年間內外各衙門發交息本二百三十五萬六千餘兩嘉慶年間發交息本五百四十五萬二千餘兩按月一分生息遇閏加增於是統計淮綱正雜內外支款共計需銀八百餘萬兩每引科則增至五六七兩之多課重商疲運銷全滯因而墊欠虧挪公私夾帶百弊從此而起實爲致弊之由前經鹽政臣延豐請停發給生息銀兩經部議准併於道

光九年欽奉

恩旨免提行本等款生息銀二十五萬餘兩俾輕成本以紓商力是兩淮生息之累已在

聖明洞鑒之中現在新章甫立刪減浮費科則稍輕然以經費難裁約計每引尙須徵銀四兩數錢若又將參觔變價作爲息本每年加徵銀十餘萬兩卽恐仍歸前轍商力實有難支且從前所發七百八十餘萬之本銀久已因公罄盡此時挪後補前係屬空賠利息今參價一項已徵者早經墊佔未徵者尙存原參更屬無本可領息

從何出惟係內務府緊款未便以墊佔滯銷致  
滋懸宕而欠解業已數年積至九十六萬餘兩  
當此各項竭蹶之時亦難於驟行全補應請自  
本年起到丙申綱止分作五年將積欠參價先  
行歸補清楚至養育兵錢糧餘參變價四萬二  
千九百兩卽在九十六萬餘兩總數之內當於  
本年先行解繳據署鹽運司俞德淵具詳前來  
理合據實

奏乞

天恩准免參價生息卽先分綱等繳以紓商力而免

懸欠感荷

鴻慈實無既極再內務府奏內併稱積欠各款四百四十八萬七千餘兩應催解清款等因臣查係道光八年鉅銷丙丁案內及前年清查

欽差會同查辦奏奉

諭旨暫緩分綱攤帶之款均經造冊咨明內務府在案仍請照案辦理合併陳明爲此恭摺具

奏伏乞

皇上聖鑒訓示謹

奏

道光十二年二月初六日具

奏三月初四日奉到

硃批該衙門議奏欽此

內務府

奏臣等伏查每年發交兩淮等處參劬變價銀兩均係支發各項經費正款之用近年以來此項銀兩因兩淮不能按期解到以致歷年拖欠至九十六萬餘兩之多不但於臣衙門經費拮据卽應放各款專行代墊出納之間倍形支絀是以臣等於道光十一年十二月初九日奏請



飭交兩江總督轉飭原領變價參劬各商名下將此  
項拖欠銀兩作爲帑本按一分生息每年解交  
臣衙門以濟公用併歷年兩淮拖欠各項銀兩  
及養育兵錢糧一款請

旨飭令該督按數解交以清款項等因

奏准在案茲據該督奏稱現在新章甫立刪減浮  
費料則稍輕若將參劬變價作爲息本每年加  
徵銀十餘萬兩卽恐仍歸前轍商力實有難支  
惟係內務府緊款未便以墊佔滯銷致滋懸宕  
除欠交養育兵錢糧餘參變價銀四萬二千九

百兩當於本年先行解繳其歷年拖欠參劬變價銀兩請自本年起分作五年歸補清楚各等因臣等悉心酌覈應准照該督所請所有兩淮積欠參劬變價銀九十六萬四千餘兩內除了解養育兵錢糧四萬二千九百兩卽於本年先行交納其餘銀九十二萬一千餘兩自本年起分作五年按數歸補清楚以濟經費而紓商力其自辛卯年起每年應交變價參劬銀兩仍令該督務飭領參各商按年變價於次年交納以後年清年款勿許再有拖欠至原奏內稱兩淮

歷年應交拖欠各款銀兩均係奏奉

諭旨暫緩分綱攤帶之款仍請照案辦理

臣

等伏查

兩淮歷年積欠各款銀兩內除停緩分綱未經  
屆限外現在拖欠各項銀兩已屆限者若干亦  
應查明迅速按款解交以濟經費勿稍延宕併  
將屆限應交之款先行造報

臣

衙門以備查覈

等因奉

旨依議欽此

請分別緩徵江淮等屬舊欠錢糧摺子

蘇撫會稿

奏爲查明江淮等屬熟田舊欠錢糧未能同時併

納恭懇

聖恩分別緩徵以紓民力事竊照江寧淮安揚州徐州海州五府州屬節年舊欠錢糧前於道光四年因民力拮据請將二年以前舊欠分年緩帶嗣復連年災歉又於道光七八九十等年將道光三年以後積欠災熟錢糧

奏准緩至十一年秋後分別啓徵今道光十一年

江寧淮安揚州徐州海州等屬秋被水災除災

歉之區應帶舊欠業於秋災情形案內

奏明緩徵欽奉

恩旨允准其成熟田地節年舊欠錢糧亦於秋災摺尾聲明另行專案具

奏併經催司飭屬趕辦去後茲據江寧布政使趙盛奎詳稱據該管府州各就所屬地方體察情形分別應徵應緩詳請具

奏前來臣等伏查道光十一年江寧淮安揚州徐州海州等屬應徵熟田舊欠內上元江寧高淳高郵泰州興化寶應七州縣成災田地俱在額

田五分以上業將成熟田地應徵新舊錢糧

奏准一體緩至次年秋後啓徵又山陽清河安東  
江都四縣節年舊欠全係坐落災區十一年熟  
田項下均無帶徵舊欠銀兩其餘各州縣成熟  
田地非毘連災區卽係連年積歉若以一歲所  
收而納節年逋欠民力實有未逮除銅山縣應  
帶徵道光五年舊欠地漕水利等款銀米豐縣  
應帶道光八九兩年災熟地漕銀兩并八年二  
限漕米及道光十年出借常平倉豆沛縣應帶  
徵道光五年復熟初限錢漕及未完道光七年

民欠錢糧陽山縣應帶徵道光十年未完災緩  
初限地漕銀米併攤徵水利等款銀兩邳州應  
帶徵道光六年災緩民賦併黃河北岸及嘉慶  
二十五年黃河南岸併衛未完銀兩米麥併攤  
徵嘉慶二十三、四兩年王平庄四限埝工銀兩  
宿遷縣應帶徵道光六年災緩初限銀米併王  
平庄四限水利及十一年攤徵民便等河二限  
銀兩睢寧縣應帶徵嘉慶二十三、四兩年及道  
光元二、八等年未完積欠銀米贛榆縣應帶徵  
道光十年未完地丁漕價銀兩均照常帶徵外

合無仰懇

皇上天恩俯准將句容江浦六合甘泉儀徵蕭縣等  
六縣嘉慶二十三年起至道光十年止各款未  
完災熟銀米併嘉慶二十二年以前加津銀兩  
銅山縣嘉慶二十三四年併道光元二三四  
六七八九十等年災熟地漕水利各款銀米豐  
縣嘉慶二十三年起至道光七年止各款災熟  
銀米及出借常平倉豆又大烏里八九兩年舊  
欠銀米等款併十年出易倉豆浦縣嘉慶二十  
三四五年及道光元二三四五六八九十年



災熟地漕銀米等款礪山縣嘉慶二十五年及  
道光元二五六七八九等年積欠災熟地漕銀  
米及攤徵水利銀兩邳州嘉慶二十四五年民  
賦併道光元二三四五六等年黃河南岸併衛  
舊欠及道光八年未完災緩民衛地漕銀米堰  
工各款宿遷縣嘉慶二十三四年及道光元  
二十等年復熟各圖併道光三四五六七八等  
年二限九年初二限舊欠銀米及五年以前王  
平莊攤徵未完銀兩睢寧縣嘉慶二十五年併  
道光三四五六七八九十等年舊欠銀米併攤徵

水利各款贛榆縣道光元年起至八年止未完  
未辦積欠銀米概行緩至道光十二年秋成後  
分別啟徵以紓民力其淮安大河揚州徐州四  
衛屯田隨同坐落州縣一律辦理除飭查造應  
徵應緩款冊另行咨部外所有熟田舊欠錢糧  
未能同時併納懇請緩徵緣由謹合詞恭摺具  
奏伏乞

皇上聖鑒訓示謹

奏

道光十二年二月初七日會

奏三月初七日奉到

硃批另有旨欽此同日奉到二月二十三日內閣奉  
上諭陶澍等奏江淮等屬熟田舊欠錢糧請分別緩  
徵一摺江蘇省江寧淮安揚州徐州海州等屬上  
年秋間被水各州縣成熟田地經該督等查明非  
毘連災區卽係連年積歉若以一歲所收併納節  
年逋欠民力實有未逮奏請分別緩徵加恩著照  
所請准將句容江浦六合甘泉儀徵蕭縣等六縣  
嘉慶二十三年起至道光十年止各款未完災熟  
銀米併嘉慶二十二年以前加津銀兩銅山縣嘉

慶二十三四年併道光元二三四六七八九十  
等年災熟地漕水利各款銀米豐縣嘉慶二十三  
年起至道光七年止各款災熟銀米及出借常平  
倉豆又大烏里八九兩年舊欠銀米等款併十年  
出易倉豆浦縣嘉慶二十三四年及道光元二  
三四五六八九十年災熟地漕銀米等款碭山  
縣嘉慶二十五年及道光元二五六七八九等年  
積欠災熟地漕銀米及攤徵水利銀兩邳州嘉慶  
二十四五年民賦併道光元二三四五六等年黃  
河南岸併衛舊欠及道光八年未完災緩民衛地

漕銀米堰工各款宿遷縣嘉慶二十三、四、五年及道光元、二十等年復熟各圖併道光三、四、五、六、七八等年二限九年初二限舊欠銀米及五年以前王平莊攤徵未完銀兩睢寧縣嘉慶二十五年併道光三、四、五、六、七、九、十等年舊欠銀米併攤徵水利各款贛榆縣道光元年起至八年止未完未辦積欠銀米概行緩至道光十二年秋成後分別啟徵以紓民力其淮安大河揚州徐州四衛屯田併著隨同坐落州縣一律辦理該督等卽刊刻謄黃遍行曉諭毋任吏胥舞弊用副朕勤恤民隱之至

意該部知道欽此

拏獲拒捕訟棍摺片

再武進縣訟棍莊午可潛回被拏拒捕脫逃前經臣等會同將緝捕懈弛之常州府知府恒泰等恭摺奏

奏撤任勒緝在案茲據署常州府知府王瑞徵委往緝拏之陽湖縣主簿章恩榮稟稱於正月十六日追至安徽旌德縣地方會同旌德宣城涇縣等縣將莊午可拏獲又獲夥黨駝背和尚等由旌德等縣遞解回蘇等情併據旌德等縣先後稟報前來除委員迎提來省提同現獲各犯

質明另行審擬具

奏外理合先行附片陳明伏乞

聖鑒謹

奏

道光十二年二月初七日會

奏三月初七日奉到

硃批嚴行審訊不可令其狡展欽此



奏請借項挑挖宿州運糧河道摺子

安撫會稿

奏爲宿州挑挖運糧河道以資宣洩而衛民生恭

摺奏祈

聖鑒事竊照安徽鳳陽府宿州境南有運糧河一道  
發源於護城河承洩北運糧溝來水又承洩上  
游江蘇省之蕭縣河南省之永城縣各境下注  
之水由護城河入該運糧河歸入漕河因該河  
原挑窄淺年久淤仰尾間又多灘嘴陡灣東南  
北均僅一孔小橋水勢未能暢達一經汛水漲  
發陰雨頻仍上游諸山湖之水漫溢平地累月

不消必須將運糧河加挑寬深併去尾閘灘嘴挑直陡灣多添橋孔使水得以暢流下注方免壅阻泛溢之虞前據該州知州周天爵勘明詳請挑辦實於州境西北民田大有裨益等情當經批飭藩司移行該管道府委員確切查勘去後茲據署安徽布政使卞星額詳稱委員涇太縣丞屠慕曾親詣宿州會同該州周天爵逐一查勘該運糧河道應將石橋北城河南灘挑挖深通使溜勢直達石橋建瓴下注出水始能通暢自城河南灘起至石橋玉帝廟岳家林張

家橋桃園集天齊廟陳家莊呂家莊至澮河口  
止估挑口寬六丈八尺及七丈二尺不等底寬  
四丈深七尺八尺不等計挑九段共工長一萬  
五百丈內除毋庸估挑河長四千二十丈實應  
挑河長六千四百八十丈內切灘嘴四處挑直  
陡灣三段共估乾土九萬八千三百三十一方  
每方銀八分共銀七千八百六十六兩四錢八  
分共估大礮土八萬九千一百七十八方每方  
銀二錢共銀一萬七千八百三十五兩六錢二  
共估需銀二萬五千七百二兩八分實係急應

挑挖之工於水利農田均資利賴且可使附近  
貧民以工代賑由府道遞加覆覈所需土方價  
值委係按例確估併無浮冒應請借項興辦普  
入該州額徵地丁銀內分年攤還歸款呈請具  
奏前來臣等覆查宿州運糧河道承洩蘇豫兩省  
各邑山湖下注之水北高南窪每逢汎水漲發  
陰雨頻仍附近田廬輒多淹漫不惟秋收無穫  
抑且播種無期今據請將運糧河加挑寬深併  
去尾閘灘嘴陡灣更於城河南北多添橋孔引  
衆水暢流入澮於州之西北一帶民田均資利

益實爲保衛田廬要工所估土方工價銀二萬  
五千七百二兩八分據該府道覆覈併無浮冒  
應請在於司庫存貯正項銀內借給興辦趁此  
春水未發趕緊集夫興挑所借銀兩請酌予分  
限六年於該州民田內按數攤徵還款旣與該  
州水利民田兩有裨益且附近乏食貧民均可  
藉工傭趁得資餬口感荷

皇仁實無旣極惟時已春仲稍遲恐趕辦不及臣等  
已飭藩司先行酌發銀兩飭令乘時妥速興辦  
再運糧河之上游秦家溝水勢曲折現經該州

勸諭附近業民在溝之尾間加挑支河一道騎  
護城堤修建涵洞以免壅塞又於州城之東關  
外修復空河故道以資利導合併陳明謹合詞  
恭摺具

奏伏乞

皇上聖鑒謹

奏

道光十二年二月十二日具

奏三月十一日奉到

硃批另有旨欽此同日奉到二月二十六日內閣奉

上諭陶澍等奏請借項挑挖宿州運糧河道分年攤  
徵歸款一摺安徽宿州運糧河道承洩江蘇河南  
兩省各邑山湖下注之水北高南窪每逢汎水漲  
發附近田廬輒多淹漫據該督等委員確切查勘  
應將運糧河加挑寬深併去尾閘灘嘴陡灣更於  
城河南北多添橋孔俾引衆水暢流入滄共估需  
土方工價銀二萬五千七百二兩零著准其在於  
司庫存貯正項銀內借給興辦所借銀兩著分限  
六年於該州民田內按數攤徵還款該督等卽飭  
令乘時妥速興辦毋許草率偷減以資宣洩而衛

民生該部知道欽此



查覆各州縣辦理災務尙屬認真亦無玩視災

務之員摺子

蘓撫會稿

奏爲遵

旨查明鹽城縣開報戶口尙無不實此外亦無玩視  
災務之員據實覆

奏仰祈

聖鑒事

臣

等承准軍機大臣字寄欽奉

上諭據朱士彥等奏訪察江蘇省災務查有淮安府  
鹽城縣知縣孔照杰開報戶口不能認真著陶澍  
等查明有無前項情弊如實有辦理不善之處著

據實奏再此外尙有玩視賑務之員一併嚴叅  
又地方紳士捐辦賑務出力應早爲奏請恩施著  
於賑務告竣之日卽行加結申送上司覈實具奏  
等因欽此臣等查上年淮安揚州等府被水成  
災情形甚重荷蒙

特旨令江寧布政使趙盛奎會同常鎮道張岳崧總  
司江北賑撫事宜臣等督飭該司道親往履勘  
覈實查辦務使吏胥無從侵欺小民得沾實惠  
如該州縣辦理不善卽令具揭請叅去後旋據  
該司道等詳稱會同分赴揚州府屬之江都甘

泉泰州東臺興化高郵寶應及淮安府屬之山陽阜寧鹽城等州縣周歷確查催令各州縣造具戶口清冊呈送併分遣隨帶委員密赴各鄉出其不意唱名抽查戶口均屬相符復沿路諮訪鄉耆人等僉稱賑務認真印委各員係按戶給票並無詭捏戶名亦無多開口數情弊惟高郵州地方有貧生災民具呈請賑寶應縣地方有縣民楊德純呈控鄉保串寫賑票之案鹽城縣地方有縣民楊彩立以縣書弊刪戶口等情赴按察司呈控移回查辦當經分飭委員前往

併令該管知府嚴查或因間賑歸來呈請給賑或因本戶先經外出俟歸來後鄉保始行給票竝非串寫惟鹽城縣控案因其有弊刪戶口之語情節較重虛實均應澈究當經該司道詳請將知縣孔昭杰撤查旋據訊出楊彩立冒開戶口經委員責處挾嫌捏控委非弊刪仍飭該縣一手經理此外竝無因賑控告之案體察各州縣放賑情形咸知功令森嚴辦理尙屬認真併委員密赴賑廠監視所放賑錢亦無短少尅扣等情正在據詳轉奏間接奉

上諭飭查復又密劄該司道親往覈查如果鹽城縣  
開報戶口未能認真暨此外如有玩視賑務之  
員卽行據實揭報該司道復又馳赴下河於正  
月二十八九等日抵鹽城境逐細密訪沿道察  
看地方俱屬安靜亦無呼號求賑之人吊覈該  
縣飢口紅冊每戶一大口一小口者十之四五  
一大口兩小口者十之二三兩大口兩小口者  
十分之一惟沙溝司第二路冊內多有一戶一  
口者摘傳鄉老親加查問緣該鹽城縣孔昭杰  
查造戶口之時因縣境被災甚重各村戶出外

逃荒往往僅畱一二人在家看守該縣下鄉挨查必須見戶見人始行入冊是以造冊時每戶一二口者居多每戶數口者較少近於刻覈其實出外之人尙有間賑歸來者例准補給各州縣皆有畱養資送冊檔可以查對現如蘇州府二首縣開報資送災民口數自八月初五日起至本年正月望後卽有鹽城縣男婦大小一萬六千二百七十四人各菴觀堂院畱養男婦亦有鹽城四千二百十九人又據嘉定縣稟報上海縣畱養鹽城災民同籍過境者二千五百八

十餘人又常熟昭文二縣開養鹽城災民七百六十餘人此外各屬稟報尙未齊全而按簿計算已惟鹽城一縣人數最多是該縣查造戶口時各災民多有出外未回已無疑義該縣孔昭杰辦理稍涉拘泥係爲預防冒混起見尙非故意從刻不能認真之比此外僅高郵寶應兩州縣曾有控案現查亦無弊竇除飭該管知府將各案速審詳辦外茲由該司道詳請先行覆

奏前來臣等伏查該司道查明鹽城縣孔昭杰開報戶口稍涉拘泥尙無前項情弊此外如高郵

州王雲寶應縣盧元良辦災尙屬竭力雖有控  
案查明並無弊竇自可無庸置議惟春賑正在  
開放鹽城地勢尤低積水之處尙未能盡行涸  
復卽展賑之後亦必須妥籌接濟自春徂夏爲  
日方長設或孔昭杰及此外各員辦理稍有未  
協自當隨時嚴叅萬不敢稍任鬆懈以仰副

聖主惠養災黎整飭官方之至意再地方紳士捐辦  
賑務併出力之紳士均屬急公慕義之人臣等  
已飭該司道等轉飭該府州縣一俟賑務完竣  
卽查明捐資三百兩以上並非身家不清及出



力之紳士於賑務告竣之日卽行加結送司具  
詳以憑奏請

恩施斷不敢任聽書吏延掇合併陳明臣等謹合詞  
恭摺覆

奏伏乞

皇上聖鑒謹

奏

道光十二年二月十二日具

奏三月十一日奉到

硃批知道了欽此

採買轉運災區減糶摺片

再被災各屬貧民業經疊次賑卹復蒙

皇上先春布凱

恩賞展賑民情安貼自可無虞失所惟現在東作方興麥收尙遠其距海最遠之處沉浸太深併二麥亦未及多種須俟秋稻成熟爲日正長前雖奏蒙

俞旨免稅招商而地方需米旣多隨到隨罄商人志在圖利遠道搬運難免價日增昂向來下江民食每藉皖西楚蜀米穀流通近因各省同災僅

時四川一省之米經過楚省卽紛紛截買米船  
來江者無幾深恐春末夏間無米可炊不得不  
預爲籌計惟是川路旣遙兼多險阻祇能就湖  
北境內川米停泊之處酌量採買又山東連年  
豐稔毘連江省之兗沂等屬與近水次之濟寧  
等處糧價較賤及本省徐州府屬接連河南境  
地小米麥價亦平擬卽委員分投購買運回災  
區減價平糶以資接濟免致臨渴掘井至買米  
應動銀款現查請撥江寧藩司賑銀一百六十  
五萬餘兩除散放冬春二賑外尙可稍有贏餘

雖江以南資送回籍尙有開賑歸來之戶未能  
截數而各屬捐賑頗多酌盈劑虛約計仍可節  
剩銀十餘萬兩請卽以此項江北賑剩之銀儘  
數採買轆轤轉運分撥災區覈實減糶將糶存  
價銀陸續提解司庫歸還原款報撥所需運腳  
各費如有不敷統於事竣另行捐廉歸補如此  
一轉移間旣於正款絲毫無損而於災黎大有  
裨益據江寧藩司趙盛奎具詳請  
奏前來理合附片陳明伏乞

聖鑒謹

奏

道光十二年二月十二日附

奏三月十一日奉到

硃批知道了欽此